

# DANIEL

## *Iuda memerodia hahaniosi*

<sup>1</sup> Iehoiakim, Iuda pavapavana, ena lohia lağanina ihatoina ai, Nebukadnesara, Babulono pavapavana, ese Ierusalem e lao henia, e daia heğege.

<sup>2</sup> Bena Ğaubada ese Iehoiakim, Iuda pavapavana, na ia imana ai e atoa, bona Dirava ena dubu kohudia haida danu. Bena ia ese unu dubu kohudia na Sinara tanona e laohaidia, ena dirava ena dubu ai, bena hari kohu na ena dirava ena habou-habou daiutuna ai e atodia.

<sup>3</sup> Bena hanua pavapavana ese Aspenasa, ena hesiai tauna badana, e hagania, ia ese Israel tauidia haida, hanua pavapavana bona hanua lohadia edia iduhu bogaragidia amo, baine mailaidia,

<sup>4</sup> uhau asi bebeka-bebekadia, raho-namo memerodia, aonega daladia iboudiai lalodliai vada e manada memerodia, lalo-parara bona kwara-haraga memerodia, heheğereğere hanua pavapavana ena rumai hesiai memerodia ai baela; bena Kaldea taudia edia toretore dalana bona edia gado bae hadibalaidia.

<sup>5</sup> Hanua pavapavana ese adia e gwaurai, dina ta ta ahudia, pavapava ana aniani gaihodia, ia ese e ani gaudia, heğereğeredia; bona vine ranuna danu, ia e inua ġauna heğereğerenia. Lağanitoi lalodliai bae hadibadia, bena una negana baine ore ai, idia na hanua pavapavana vairanai bae hedinarai.

**6** Unu uhau bogaragidiai na Daniel bona Hana-nia bona Misael bona Asaria, Iuda iduhuna memerodia.

**7** Bena hari hesiai tauna badana ese ladadia ma e nemaidia; Daniel e nemaia Beletesasara; Hana-nia e nemaia Sadaraka; Misael e nemaia Mesaka; bona Asaria e nemaia Abedenego.

**8** A Daniel ese lalona e hadaia, ia na hanua pavapavana ana aniani gaihodia eiava e inuava vine-ranuna amo basine hahemiro eto; taunabunai ia ese hesiai tauna badana e noia, baine gwau maoro, ia na sibona basine hahemiro.

**9** Bena Dirava ese hesiai tauna badana lalona e ha-uraia, ia ese Daniel baine lalo namo henia bona baine bogaia hisi.

**10** Bena hesiai tauna badana ese Daniel e hamaoroa, eto, Lau na garimu, egu lohia, hanua pavapavana, amu aniani bona inuinu ġaudia e gwaurai hidi tauna, ese baine itamu, tau-animu se badamu, bamomu, oi ida sihi tamona memerodia, tau-anidia e badamu heğereğerena baine itaia na garina. Unu amo boma hahekawakwanaigu, hanua pavapavana ese kwaragu baine utua oho.

**11** Bena Daniel ese hereğü tauna, hesiai tauna badana ese Daniel bona I lanania bona Misael bona Asaria ireğudia ai vada e halaoa tauna, na e hereva henia, eto:

**12** Emu hesiai memerodia na ba dibamai toho, dina gwauta lalodiae; uma anianidia mo bona ranu mo bae henimai, baia ani bona baia inu

**13** Bena ai oromamai bona hari uhau haida; hanua pavapavana ana aniani gaihodia e animu memerodia, oromadie ba itadia; bena ba itamai heğereğerena emu hesiai memerodia ba kara hen-

imai.

<sup>14</sup> Taunabunai, se edia hereva e abia dae, bena dina gwauta lalodai e dibadia toho.

<sup>15</sup> Dina gwauta e ore ai, ia ese e itadia, oromadia ai bona tau-anidia ai idia ese hari hanua pavapava ana aniani gaihodia e aniva memerodia iboudiai na e hereadia.

<sup>16</sup> Taunabunai heregu tauna ese adia aniani gaihodia bona aida vine ranuna na e abi oho, bena uma anianidia mo e henidia.

<sup>17</sup> Hari uhau hahaniosi na Dirava ese lalo-parara bona revareva iduahidia bona itoredia bona aonega e henidia; Daniel na danu mathanai bona nihi iboudiai mai dibana.

<sup>18</sup> Hanua pavapavana vada e hahegani bae hakaudia vareai negana e ore, bena hesiai tauna badana ese e hakaudia vareai, Nebukadnesara vairanai.

<sup>19</sup> Bena hanua pavapavana na idia ida e hereva-hereva, bena idia iboudiai bogaragidia amo ta se davaria, unu Daniel bona Hanania bona Misael bona Asaria hegeregeredia; taunabunai idia hahaniosi na hanua pavapavana vairanai do gigini.

<sup>20</sup> Bena lalo-parara bona aonega daladia iboudiai lalodai hanua pavapavana ese e nanadaidia, bena vada e dibadiaidia ese mea taudia bona babalau taudia iboudiai ena basileia idoinai lalonai na e hereadie nega hagwauta.

<sup>21</sup> Bena Daniel na gabuna ai do noho, ela bona King Kurese ena lohia laiganina gini gunana.

## 2

*Nebukadnesara ena nihi*

<sup>1</sup> Nebukadnesara ena lohia lağania iharuana ai, Nebukadnesara e nihi; bena lalona na e hekwarahiva bona se mahutava.

<sup>2</sup> Bena hanua pavapavana na e hahedua, mea taudia bona babalau taudia bona rohe taudia bona Kaldeataudia na bae boiridia, hanua pavapavana ena nihi bae herevalai henia. Taunabunai, idia na e raka vareai, hanua pavapavana vairanai e gini.

<sup>3</sup> Bena hanua pavapavana ese e hamaorodia, eto, Na nihi, bena laloguna e hekwarahimu, nihi baina dibaia na tomamu.

<sup>4</sup> Bena Kaldea taudia ese hanua pavapavana e hamaoroa, eto, Pavapava e, ba mauri hanaihanai! Emu hesiai taudia na nihi ba hamaorolaimai, bena ai ese anina baia gwauria.

<sup>5</sup> Bena hanua pavapavana ese Kaldea taudia e haere henidia, eto, Na hamaoromui momokan imu, nihi bona anina danu basio hamaorolaigu, vada bae daremui patapata bona emui rumu bae ġigidia dobi.

<sup>6</sup> A nihi bona anina vada ba hahedinarai, bena lauegu amo harihari ġaudia bona dava namodia bona dagi badadia baina henimui. Taunabunai, nihi bona anina danu ba hadibalaigu.

<sup>7</sup> Idia ese nega iharuana ma e haere, eto, Hanua pavapavana ese ena hesiai taudia na nihi baine hadibalaimai, bena ai ese anina baia gwauria.

<sup>8</sup> Hanua pavapavana ma e haere, eto, Lau dibagu momokani umui na o halahemu, badina be vada o diba egu hereva na momokani,

<sup>9</sup> nihi na basioma hadibalaigu davamui baine tamona mo. Vada o henega bou, hereva koikoidia bona dikadia lau vairagu ai ba gwaurai, ela bona

nega ta. Taunabunai, nihi vada ba hamaorolaigu, bena baina diba umui na anina danu ba hamaorolaigu diba.

<sup>10</sup> Bena Kaldea taudia ese hanua pavapavana e haere henia, eto, Asi tauna ta tanobada ai ese hanua pavapavana ena hahedua baine badinaia diba; badina be asi hanua pavapavana badana bona mai siahuna ta ese ġau unuhetomana vada e tahua, mea tauna ta eiava babalau tauna ta eiava Kaldea tauna ta enai.

<sup>11</sup> Hanua pavapavana ese e tahuamu ġauna na auka herea; tau ta ese hanua pavapavima basine hamaorolaia diba, a dirava haida ese. A unu dirava na taunimanima dekediai asie nohomu.

<sup>12</sup> Una hereva dainai hanua pavapavana na e badu, lalona na e ġaraġara herea, bena e haheġani aonega taudia iboudiai Babulono ai na bae aladia ore.

<sup>13</sup> Taunabunai, hahedua herevana e siaia lao, aonega taudia na bae aladia mase; bena Daniel mai bamona ida danu e tahudia, bae aladia mase totona.

<sup>14</sup> Bena Daniel ese ena hereva nahuana e tohoa, bena mai lalo-pararana ida Ariok, hanua pavapavana ena hegima oreana biaguna, aonega taudia Babulono ai iala-masedia totona ela tauna, na e haere henia.

<sup>15</sup> Ia ese Ariok, hanua pavapavana ena tuari lohiana, e nanadaia, eto, Badina be dahaka hanua pavapavana ena hahedua na auka herea? Bena Ariok ese una kara na Daniel e hamaorolaia.

<sup>16</sup> Bena Daniel na e raka vareai, hanua pavapavana e noia, nega ta baine gwaurai henia, nihi anina na hanua pavapavana baine hamaorolaia helaooreana.

**17** Bena Daniel na ena rumela, una kara na ia bamona lisanania bona Misael bona Asaria e hamaorolaidh,

**18** bena e hamaorodia danu, guba Duavana ena hebogahisi bae tahua, una ġau hehunina dainai, Daniel mai bamona ida na aonega taudia Babulono ai oredia ida basie mase bou helaoreana.

**19** Bena una ġau hehunina na Daniel enai e hedinarai, hanuaboi mata-hanaina lalonai. Bena Daniel ese guba Duavana e hanamo.

**20** Daniel eto,  
Dirava ladana bae hanamoela bona hanaihanai;  
aonega bona goada na ienai.

**21** Ia ese nega bona nega hetoadia e ha-idaudiamu;  
ia ese hanua pavapavadia e abidia ohomu  
bona e haginidiamu;  
ia ese aonega taudia na aonega e henidiamu,  
bona lalo-parara taudia na lalo-parara e henidiamu.

**22** Ia ese ġau dobudia bona ġau hehunidia e hahed-inaraidiamu;  
dibura ai e miamu ġaudia na ia dibana,  
diari na ienai e miamu.

**23** Senegu edia Dirava e,  
lau na hanamomumu, na imodaimumu;  
badina be oi ese aonega bona goada vada o  
henigu,  
bona ai ese a noimu ġauna na vada o hadibal-aigu;  
badina be hanua pavapavana enai e vara karana  
na  
vada o hadibalaimai.

**24** Taunabutlai Daniel na Ariok, hanua pavapavana ese aor!ega taudia Babulono ai iala-masedia

e duanaia tauna, dekenai e raka vareai. Ela, e hereva henia, eto, Aonega taudia Babulono ai basio aladia mase; lau ba hakaugu vareai hanua pavapavana vairanai, bena lau ese hanua pavapavana ena nihi anina baina hamaorolaia.

<sup>25</sup> Bena Ariok ese Daniel e hakaua vareai haraāga, hanua pavapavana vairanai, e hamaoroa, eto, Iuda amo e mailaidia bena iniseni ai e hanohodia taudia bogaragidiai tau ta vada na davaria, ia ese nihi anina na hanua pavapavana baine hamaorolaimu diba.

<sup>26</sup> Bena hanua pavapavana ese Daniel, ladana ta be Beletesasara, e nanadaia, eto, Egu nihi bona anina danu ba hamaorolaigu diba eiava?

<sup>27</sup> Daniel ese hanua pavapavana e haere henia, eto, Aonega taudia eiava babalau taudia eiava mea taudia eiava hisiu toadia mai dibadia taudia ta ese hari āgau hehunina, hanua pavapavana ese vada e nanadailaia āgauna, na hanua pavapavana basine hamaorolaia diba.

<sup>28</sup> A āgau hehunidia e hahedinaraidiamu Diravana na guba ai; ia ese dina gabedia ai bae vara āgaudia na oi King Nebukadnesara vada e haheitalaimu. Emu nihi, bona mata-hanai āgaudia kwaramu ai e hedinarai, emu mahuta patana latanal o hekureva negana ai, āgaudia bini.

<sup>29</sup> Pavapava e, emu mahuta patana latanai o hekureva negana ai, lalo-hadai haida na emu ai e kau, nega gabedia ai bae vara āgaudia o lalo hadailai; bona āgau hehunidia e hahedinaraidiamu Diravana ese bae vara āgaudia na e hadibalaimu.

<sup>30</sup> A ina āgau hehunina na egu ai vada e hahedinaraia, dia egu aonega ese mauri taudia iboudiai edia aonega na e hereadiamu dainai, to anina na

hanua pavapavana baina hadibalaimu bona oi sibomu emu lalo-hadai ba dibadia helaoreana.

<sup>31</sup> Pavapava e, kaivakuku badana ta o itaia. Una kaivakuku bada-hereana bona kiamakiama-hereana na oi vairamu ai e gini, ita-itana na mai garina.

<sup>32</sup> Una kaivakuku kwarana na *gold* namo-hereana, kemena bona imana na *silver*, bogana bona koekoena na auri labora-labora,

<sup>33</sup> bona aena na auri. Aena palapaladia na taidia auri bona taidia raro.

<sup>34</sup> Bena o raraia negana ai, nadi ta vada e heutu oho, a d; a taunimanima imana ese; bena una nadi ese una kaivakuku aena palapaladia, auri bona raro gaudia, ai e tubu, e hamakohidia rohoroho.

<sup>35</sup> Bena auri, raro, auri labora-labora, *silver*, *gold*, iboudiai na e makohi sisisisi, taboro negana ai uit e kwadiamu gabuna momorudia na heheto; bena lai ese e hodadia oho, sidia taidia asie davaridia diba. A hari kaivakuku ai e tubu nadina na ororo badana ai ela, tanobada idoinai e hahonua.

<sup>36</sup> Nihi na bunai. Harihari ai ese ia anina na hanua pavapavana baia hamaorolaimu.

<sup>37</sup> Pavapava e, oi na pavapava edia pavapava; guba Diravana ese basileia bona siahu bona goada bona hairai na oi vada e henimu;

<sup>38</sup> bona taunimanima natudia bona uda bormadie bona atai manudia, edesenai ai edesenai ai e nohomu, na oi imamu ai vada e atodia bona iboudiai biagudia ai vada e halaomu: oi na hari kwara, *gold* ġauna.

<sup>39</sup> Oi murimu ai basileia ta ma baine gini, a dia oiemu heġereġerena; ma ia murinai ihatoina, auri

labora-labora ġauna; ia ese tanobada idoinai baine lohiaia.

<sup>40</sup> Bena basileia ihahanina baine gini, mai goadana auri na heto; badina be auri ese ġau iboudiai e hamakohidia sisisisimu bona e huaridia patapatamu; bena e hahemakohimu aurina na heto ia ese ini iboudiai baine hamakohidia bona baine taodia pata.

<sup>41</sup> Ina danu, hari ae palapaladia bona ae kwakikwakidia o itadia, taidia na uro ikarana tauna ena raro bona taidia na auri, heğereğerenai una basileia baine haheparara; a ia lalonai auri ena auka taina baine mia, hari auri o itaia, raro manoka-manokana ida e hebulo, na heto.

<sup>42</sup> Bona hari ae kwakikwakidia taidia na auri bona taidia na raro manoka-manokana heğereğerenai una basileia kahana baine goada bona kahana baine makohi kava.

<sup>43</sup> Bona auri o itaia, ia na raro manoka-manokana ida e hebulo, heğereğerenai idia na bae headava hedoa-hedoa, a basie hahetamona, auri bona raro e hebulomu ai asie hahetamonamu na heto.

<sup>44</sup> Unu pavapava edia nega ai guba Diravana ese basileia ta baine haginia, nega ta ai basie habuaia tari diba ġauna; bena ena lohia siahuna na basine hanai bese idauna ta enai. Ia ese unu basileia iboudiai na baine hamakohidia sisisisi bona baine hadokodia, bena baine gini hanaihanai.

<sup>45</sup> Nadi ta o itaia heğereğerenai, ororo amo e heutu oho, a dia taunimanima imana ese; bena una nadi ese auri, auri labora-labora, raro, *silver* bona *gold* na e hamakohi sisisisi. Dirava badana ta ese nega gabena ai bae vara ġaudia na hanua pavapavana vada e hadibalaimu. Nihi na momokani, bona

anina na momokani.

<sup>46</sup> Bena King Nebukadnesara na tano ai e goru diho, Daniel e toma henia diho, bena e hahegani, boubou ġauna bona muramura mai bonana na bae hahelaġaia iena.

<sup>47</sup> Hanua pavapavana ese Daniel e hereva henia, eto, Momokani, emu Dirava na dirava edia Dirava bona pavapava edia Lohia, bona ġau hehnidia ihahedinaraidia Diravana; badina be oi ese ina ġau hehunina ihahedinaraina vada o diba.

<sup>48</sup> Bena hanua pavapavana ese Daniel na dagi badadia bona herahia badadia ġaudia momo herea e henia; bona Babulono tanona idoinai lohiana ai bona aonega taudia iboudiai Babulono ai biagudia ai e halaoa.

<sup>49</sup> Bena Daniel ese hanua pavapavana e noia; bena ia ese Sadaraka bona Mesaka bona Abedenego e duanaidia, Babulono tanona bae biagua; a Daniel na hanua pavapavana ena rum a i e nohova.

### 3

#### *Lahi badana*

<sup>1</sup> King Nebukadnesara ese *gold* kaivakukuna ta e karaia, latana na kiubit tauratoi-ahui bona lababana na kiubit tauratoi. Ia ese Dura taorana ai e haginia, Babulono tanona ai.

<sup>2</sup> Bena King Nebukadnesara ese hereva e siaia lao, heitatao taudia, hanua lohiadia, basileia lohiadia, hahealo taudia, moni inaridia taudia, hahemaoro taudia badadia bona maraġidia bona kaha ta ta ai mai dagidia taudia iboudiai na baema, hari King Nebukadnesara ese vada e haginia kaivakukuna ihahelaġana totona.

<sup>3</sup> Bena hari heitatao taudia, hanua lohiadia, basileia lohiadia, hahealo taudia, moni inaridia taudia, hahemaoro taudia badadia bona maraġidia bona kaha ta ta ai mai dagidia taudia iboudiai na e hebou, King Nebukadnesara ese vada e haginia kaivakukuna ihahelaġana totona, bena idia na King Nebukadnesara ese vada e haginia kaivakukuna vairanai e gini.

<sup>4</sup> Bena gwau-lasi tauna na e hereva badabada, eto, Bese idau-idau bona basileia idau-idau bona gado idau-idau taumui e, Pavapava ese e haganimuimu,

<sup>5</sup> kibi, ivilikou, gitara, eukaleli, hatai ġauna badana, gaba bona rege ġaudia idau-idau reġedia ba kamonai negana ai, ba goru goru diho, hari *gold* kaivakukuna, King Nebukadnesara ese vada e haginia ġauna, ba toma henia diho;

<sup>6</sup> a daika basine goru diho bona basine toma diho, ia na maoromaoro bae abia, lahi ta, e hururu hereamu bona e siahu hereamu lahina, Ialonai bae tahoa vareai.

<sup>7</sup> Taunabunai, taunimanima iboudiai ese kibi, ivilikou, gitara, eukaleli, hatai ġauna badana, gaba bona rege ġaudia idau-idau reġedia e kamonai negadia ai, bese idau-idau bona basileia idau-idau bona gado idau-idau taudia iboudiai na e goru goru diho, hari *gold* kaivakukuna, King Nebukadnesara ese e haginia gauna, na e toma henia diho.

<sup>8</sup> Taunabunai, una negana ai Kaldea taudia haida ema, edia lalo-dika ai Iuda taudia e habade-laidia.

<sup>9</sup> Idia ese King Nebukadnesara e hamaoroa, eto, Pavapava e, ba mauri hanaihanai!

**10** Pavapava e, oi na o hahegani, olo kibi, ivilikou, gitara, eukaleli, hatai ġauna badana, gaba bona rege ġaudia idau-idau reğedia bae kamonai taudia iboudiai na bae goru goru diho, hari *gold* kaivakukuna bae toma henia diho;

**11** a basine goru diho bona basine toma diho tauna na lahi ta, e hururu hereamu bona e siahу hereamu lahina, lalonai bae tahoa vareai.

**12** luda taudia haida iniseni ai, oi ese vada o duanaidia, Babulono tanona bae biagua taudia: Sadaraka, Mesaka bona Abedenego. Pava-pava e, unu tatau ese asie kamonai henimumu; oiemu dirava isiaidia asie lao henimu, bona *gold* kaivakukuna, oi ese o haginia ġauna, asie toma henia dihomu.

**13** Bena Nebukadnesara na e badu garaġara, e hahedua, Sadaraka, Mesaka bona Abedenego bae mailaiadia. Bena unu tatau na e hakaudia vareai, hanua pavapavana vairanai.

**14** Nebukadnesara ese e nanadaidia, eto, Sadaraka, Mesaka bona Abedenego e, momokani umui ese egu dirava isiaidia asio lao henimu bona *gold* kaivakukuna, vada na haginia ġauna, asio toma henia dihomu a?

**15** Benaini, lalomui bema heġeregere, kibi, ivilikou, gitara, eukaleli, hatai ġauna badana, gaba bona rege ġaudia idau-idau reğedia ba kamonai negana ai na ba goru diho, bona vada na karaia kaivakukuna ba toma henia diho, vada namo. A basioma toma diho, e hururu hereamu bona e siahу hereamu lahina lalonai maoromaoro baema tahomui vareai; bena edena dirava ese lau imagu amo baine hamaurimui?

**16** Bena Sadaraka, Mesaka bona Abedenego ese

hanua pavapavana e haere henia, eto, Nebukadnesara e, asi badina baia haere henimu.

<sup>17</sup> Emai Dirava, isiaina a lao heniamu Diravana, na ihamaurimai bema ura, ia ese hari e hururu hereamu bona e siahу hereamu lahina amo bona oi pavapava taumu imamu amo do baine hamaurimai.

<sup>18</sup> A basinema ura danu, pavapava e, vada ba diba, ai ese emu dirava isiaidia basia lao henи, bona hari *gold* kaivakukuna, oi ese vada o haginia āgauna, na basia toma henia diho.

<sup>19</sup> Bena Nebukadnesara na badu ai e honu honudae, bona ia vairana na e ha-idaua Sadaraka, Mesaka bona Abedenego ediai. Ia e hahedua, eto lahi na nega hahitu ma bae hasiahua, dia vaevae e hasiahuaava hegeregrena.

<sup>20</sup> Bena ia ese ena tuari oreana taudia mai goadadia haida e haganidia, idia ese Sadaraka, Mesaka bona Abedenego na bae guidia, hari lahi, e hururu herea bona e siahу herea lahina, Ialonai bae tahodia vareai.

<sup>21</sup> Bena unu tatau na mai dabuadia bona hahedokidia bona mai edia kwara āgaudia bona mai dabua logoradia ida e guidia, e hururu herea bona e siahу herea lahina ai e tahodia vareai.

<sup>22</sup> Bena hanua pavapavana ena hahedua na auka bona lahi na siahу herea dainai, lahi hururuna ese unu Sadaraka, Mesaka bona Abedenego e abidia lao taudia na e aradia mase.

<sup>23</sup> Unu tatau tatoiosi, Sadaraka, Mesaka bona Abedenego na e hururu herea bona e siahу herea lahina lalonai eha tubu, mai īguidia ida.

<sup>24</sup> Bena King Nebukadnesara e hoa dikadika; bena e tore isi haraāga-haraāga. Ia ese ena hahealo

taudia e nanadaidia, eto, Tatau tatoi na mai iğuidia ida lahi lalonai ta tahodia vareai ani? Idia ese hanua pavapavana e haere henia, eto, Pavapava e, momokani.

**25** Ia na e haere, eto, A lau ese tatau hahani heruhadia ai na itadiamu, lahi bogaraginai e loaloamu, asi berodia; bona ihahanina oromana na dirava ta natuna na heto.

**26** Bena Nebukadnesara ese hari e hururu herea bona e siahu herea lahina gabuna iduarana e raka henia kahi, eto, Sadaraka, Mesaka bona Abedenego, Herea Mikamika Diravana ena hesiai taudia, ini a raka lasi mai. Bena Sadaraka, Mesaka bona Abedenego na lahi amo e raka lasi.

**27** Bena heitatao taudia, hanua lohiadia, basileia lohiadia bona hanua pavapavana ena hahealo taudia na e hegogo, e itaia, lahi na asi siahuna unu tatau tau-anidia ediai; kwaradia huidia na asie hedederai, edia dabua na asie dika, bona lahi varagana na lasi ediai.

**28** Bena Nebukadnesara eto, Sadaraka, Mesaka bona Abedenego edia Dirava na aita hanamoa. Ia ese ena aneru ta e siaia, ena hesiai taudia, ia e abidadama henia bona hanua pavapavana ena hahegani e dadaraia bona idau dirava ta isiaina asie lao hen i bona asie toma henia diho a edia Dirava korikorina mo dainai tau-anidia e hen i taudia, na e hamauridia.

**29** Taunabunai, lau na haheganimu; bese ta eiava basileia ta eiava gado ta taudia ese Sadaraka, Mesaka bona Abedenego edia Dirava na bae uduguiraia, vada bae daredia patapata, bona edia ruma na bae ġigidia dobi; badina be asi dirava ta na hahemauri mai dibana ina

heğereğerena.

<sup>30</sup> Bena hanua pavapavana ese Sadaraka, Mesaka bona Abedenego e hadaedia, Babulono tanona ai.

## 4

### *Nehukadnesara e kavaia*

<sup>1</sup> A King Nebukadnesara ena hereva, bese idau-idau bona basileia idau-idau bona gado idau-idau iboudiai, tanobada idoinai e noho heniamu tau-dia iboudiai ediai, binai.

Maino baine bada emui ai!

<sup>2</sup> Vada na laloa, namona be toa bona hoa kardia Herea Mikamika Diravana ese egu ai vada e kara mani aina hamaorolaimui.

<sup>3</sup> Iena toa na daka bada!

lena hoa karadia na daka siahu!  
lena basileia na e hesiriu hanaihanaimu,

bona ena lohia siahuna na uru uru latadiai.

<sup>4</sup> Lau Nebukadnesara na egu rumai na noho namonamova, egu pavapava rumana ai egu namo na habadaiava.

<sup>5</sup> Nega ta na nihi, bena una nihi ese e hagarigu; egu mahuta patana latanai na hekureva negana ai, egu lalo-hadai bona mata-hanai ġaudia kwaragu lalonai ese e hagarigu.

<sup>6</sup> Taunabunai na hahedua, aonega taudia iboudiai Babulono ai na vairagu ai bae mailaidia, nihi anina bae hadibalaigu totona.

<sup>7</sup> Bena mea taudia, babalau taudia, Kaldea taudia bona hisiu toadia mai dibadia taudia na e raka vareai; bena lau ese nihi na hamaorolaidia, a anina ihadibalaigu na asi dibadia.

<sup>8</sup> Dokona ai Daniel e raka vareai; ia ladana ta na Belelesasara, egu dirava ladana e nemailaia, bona

dirava helaḡadia ese e roheamu. Bena una nihi na hamaorolaia, nato,

<sup>9</sup> Beletesasara e, oi na mea tauna badana, badina be lau dibagu dirava helaḡadia ese vada e rohemu, bona ġau hehunina ta na dia hehuni oiemu ai. Na itaia nihina binai; oi ese anina do ba hamaorolaigu.

<sup>10</sup> Egu mahuta patana latanai na hekureva negana ai, mata-hanai ġaudia kwaragu lalonai bini: na roha lao, au ta na itaia, tanobada bogaraginai; ia na gaulatalata.

<sup>11</sup> Au na e tubu, e lo e laova, dorina na guba ai e kau, bena tanobada idoinai dokona amo e itaiaava.

<sup>12</sup> Rauna na kasiri-kasiri, huahuana na momo herea, taunimanima iboudiai adia aniani ġaudia. Uda boromadia na ia ikerukeruna ai e hekureva, bona atai manudia na ia rigina ai e nohova, mauri ġaudia iboudiai na ia ese e ubudiava.

<sup>13</sup> Egu mahuta patana latanai na hekureva negana ai, kwaragu ena mata-hanai lalonai na itaia, hegima tauna helaḡana ta na guba amo e diho.

<sup>14</sup> E boi lolo, ini e gwau toma: Au ba hagaria, rigina ba lapadia oho, rauna ba padadia oho, huahuana ba ġigidia rohoroho; uda boromadia na ia henuna amo bae heau lasi bona manu na rigina amo bae roho oho.

<sup>15</sup> A au badina mai ramuna ida na tano ai ba rakatania, bona īgeġelaina aurina, auri bona auri-labortalabora amo e karaia ġauna, amo ba ġeġea; bena rei matamata bogaraginai do baine mia. Guba hununa ese baine hapariparia; uda boromadia ida baine noho tanobada reina ai.

<sup>16</sup> Ia lalona, taunimanima lalona, na baine idau, boroma lalona bae henia; bena laġani hitu na ia

latanai bae ha-ore.

<sup>17</sup> Irevana na hegima taudia edia hahedua amo, bona ihahemaoro-henina na helāga taudia edia hereva amo, bena mauri taudia na bae diba, Herea Mikamika Diravana ese taunimanima edia basileia e lohiaiamu, bona e uramu baine henia tauna na e heniamu, bona uhugai herea tauna na hekwara tauna ai e halaoamu.

<sup>18</sup> Una nihi na lau, King Nebukadnesara, ese na itaia. A oi, Beletesasara e, anina ba gwauraia hedinarai, badina be aonega taudia iboudiai egu basileia lalonai na anina ihamaorolaigu asi dibadia, a oi na mai dibamu, badina be dirava helāgadie ese vada e rohemu.

<sup>19</sup> Bena Daniel, ladana ta na Beletesasara, kudouna na e hetaha nega sisina ai; bona ena lalo-hadai ese e hagaria. Bena hanua pavapavana eto, Beletesasara e, nihi eiava anina ese basine hagarimu. Beletesasara na e haere, eto, Egu lohia e, bema nihi na e inai henimumu taudia latadiai bona anina na oi inaimu latadiai, una na bema namo.

<sup>20</sup> Au o itaia, e tubu bona e lo e laova ela bona dorina na guba ai e kau bona tanobada idoinai dokona amo e itaiva ġauna,

<sup>21</sup> rauna na kasiri-kasiri bona huahuana na momo herea, taunimanima iboudiai adia aniani ġaudia, bona ikerukeruna ai uda boromadia e hekureva bona rigina ai atai manudia e nohova ġawla,

<sup>22</sup> pavapava e, una na oi. Oi na vada o tubu bona vada o lo; vada o tubu badabada ela bona guba, bona emu siahu na e laomu ela bona tanobada dokodia.

**23** Hanua pavapavana ese hegima tauna helāgana e itaia, guba amo e diho, eto: Au ba hagaria, ba habuaia tari, a au badina mai ramuna ida na tano ai ba rakatania, bona igegeleina aurina, auri bona auri-laboralabora amo e karaia ġauna, amo ba ġeġea, bena rei matamata lalonai baine mia; bena guba hununa ese baine hapariparia, uda boromadia ida baine noho, ela bona laġani hitu na ia latanai bae ha-ore.

**24** Pavapava e, anma binai: Herea Mikamika Diravana ena hahedua egu lohia bona egu pavapava latamu ai vada e kau;

**25** e tomu taunimanima bogaragidia amo bae lulumu lasi, uda boromadia ida ba noho; rei do bavani, boromakau na heto, bona guba hununa ese baine hapariparimu; laġani hitu na oi latamu ai bae ha-ore, ela bona ba diba Herea Mikamika Diravana ese taunimanima edia basileia e lohi-aiamu, bona e uramu baine henia tauna na e heniamu.

**26** Bona e hahegani, au badina mai ramuna ida baine mia heġereġerena ai, emu basileia baine mia oiemu, oi ba diba Guba Diravana e lohiamu negana amo.

**27** Taunabunai, pavapava e, egu hahealo na boma abia dae; emu kara dika boma hadoko, kara maoromaorodia boma kara, bona emu kara havara danu boma hadoko; e hahisidiamu taudia boma bogadia hisi; bena reana emu noho-maino taina ma baine daudau.

**28** Ina idoinai na King Nebukadnesara latanai e kau.

**29** Hua gwauta-rua e ore, bena ia ese pavapava rumana Babulono ai guhina latanai e raka eva-

evava.

<sup>30</sup> Bena hanua pavapavana eto, Ina na Babulono badana, egu siahu hereana amo vada na haginia, lau pavapava egu noho gabuna bona lau pava-pava hairaigu ihabadana ani?

<sup>31</sup> Hanua pavapavana na dounu e herevava ai, gado ta na guba amo e diho, eto, King Nebukadnesara e, vada e hereva henimumu, e tomu “Basileia na emu amo vada eme heabi oho;

<sup>32</sup> taunimanima bogaragidia amo bae lulumu lasi, uda boromadia ida ba noho; rei do bavani, boromakau na heto; lagani hitu na oi latamu ai ba ha-ore, ela bona vada ba diba, Herea Mikamika Diravana ese taunimanima edia basileia e lohi-aiamu, bona e uramu baine henia tauna na e heniamu”.

<sup>33</sup> Bena asi vanahana una hereva anina e vara Nebukadnesara latanai. Taunimanima bogaragidia amo e lulua lasi, bena rei e aniva, boromakau na heto, bona tau-anina na guba hununa ese e haparipariava, ela bona huina e lata, ugava huina na heto, bona kahauna na manu kahaudia na heheto.

### *Nebukadnesara ena hereva*

<sup>34</sup> Unu dina dokodia ai, lau Nebukadnesara na gaga dae guba ai, bena daragu ma e vara lou, bona Herea Mikamika Diravana na hanamoia, e noho hanaihanaimu Diravana na imodaia bona na heatolaia.

Badina be ia siahuna na mia hanaihanai siahuna, bona iena basileia na uru ta ela bona ma uru ta e hesiriumu;

<sup>35</sup> tanobada inoholaina taudia iboudiai e nenediamu, dia gaū ta na heto;

ia na sibona ena ura e karamu guba oreana  
 bogaraginai,  
 bona tanobada inoholaina taudia  
 bogaragidiai danu;  
 ta ese ia imana basine laoa ahu diba,  
 eiava basine nanadaia, basineto “Dahaka o  
 karamu?”

<sup>36</sup> Una negana ai danu daragu ma e vara lou; bona pavapava dagina bona hairaina ma e ahu-laigu, egu basileia ihahairaina totona. Egu ha-healo taudia bona egu lohia taudia ese e tahugu, bona egu basileia ai e haginigu, bena egu siahu na e bada e laova.

<sup>37</sup> Harihari lau Nebukadnesara ese guba Pava-pavana na imodaiamu, na heatolaiamu bona na matauraiamu; badina be iena kara iboudiai na mamaoro-mamaoro bona ena dala na gogoeva-gōgoeva; bona mai hekokorokudia ida e rakamu taudia ihahemaraidia na mai dibana.

## 5

### *King Belesasara ena aria*

<sup>1</sup> King Belesasara ese aria badana ta e karaia, ena lohia taudia daha-ta adia; bena ia ese vine ranuna e inua, unu tatau daha-ta vairadiai.

<sup>2</sup> Belesasara ese vine ranuna e demaia toho, bena ia na e hahegani, tamana Nebukadnesara ese Ierusalem dubuna amo e abidia keheredia, *gold* bona *silver* gaudia, na bae mailaidia, bena hanua pavapavana bona ena lohia taudia bona adavana korikoridia bona e adavadia hahinedia danu ese vine ranuna na unu ġau amo bae inu.

<sup>3</sup> Bena haida ese hari *gold* bona *silver* keheredia, Ierusalem dubuna, Dirava ena dubu, amo e abi

ḡaudia, na e mailaidia; bena hanua pavapavana bona ena lohia taudia bona adavana korikoridia bona e adavadia hahinedia ese vine ranuna na unu ḡau amo e inuinulai.

<sup>4</sup> Idia ese vine ranuna vada e inu, bena *gold, silver*, auri labora-labora, auri, au bona nadi dravadia e imodaidia.

<sup>5</sup> Asi vanahana tau ta imana kwakikwakidia e hedinarai, bena hanua pavapavana ena ruma habana ai e toretore, lamepa patana hevaira-hehenina ai, bena hanua pavapavana ese una ima na revareva e toрева ai e itaia.

<sup>6</sup> Bena hanua pavapavana na e laboraia ḡuguru, bona ena lalo-hadai ese e halalagaia, e hebalarea utu-utu, tuina ruaosi e tabubu-tabubu.

<sup>7</sup> Bena hanua pavapavana e boiboi badabada, babalau taudia bona Kaldea taudia bona hisiu toadia mai dibadia taudia bae hakaudia vareai. Bena hanua pavapavana ese aonega taudia Babulono ai e hereva henidia, eto, Ina revareva baine duahia bona anina baine hadibalaigu tauna na dabua kakakakana amo bae hadabualaia, bona *gold* agevana na aiona ai bae ha-inulaia, bona basileia lalonai lohia dagina ihatoina baine abia.

<sup>8</sup> Bena hanua pavapavana ena aonega taudia iboudiai e raka vareai, a una revareva iduahina asi dibadia bona asie heğereğere anina na hanua pavapavana bae hadibalaia.

<sup>9</sup> Bena King Belesasara e gari dikadika bona e laboraia ḡuguru. Ena lohia taudia danu e daradarava.

<sup>10</sup> Hanua pavapavana bona ena lohia taudia edia hereva daidiae, hanua pavapavana hahinena na aria rumana ai e raka vareai. Bena hanua pavapavana hahinena eto, Pavapava e, ba mauri

hanaihanai! Emu lalo-hadai ese basie halalağamu bona basine laboramu guguru.

<sup>11</sup> Emu basileia lalonai dirava helagadia ese e roheamu tauna ta e nohomu. Tamamu ena nega ai, diari bona lalo-parara bona aonega, dirava edia aonega heğereğerena, na e davaridia; bena tamamu King Nebukadnesara ese mea taudia, babalau taudia, Kaldea taudia bona hisiu toadia mai dibadia taudia biagudia ai e halaoa;

<sup>12</sup> badina be lauma namo-hereana bona aonega bona lalo-parara na Daniel (hanua pavapavana ese Beletesasara e nemaia tauna) enai e davaridia, nihi bona hereva hehunidia anidia ihahedinaraidia ai bona lalo-hekwarahi ihamaoromaorodia ai. Mani emu kara, Daniel ae boiria, bena ia ese anina baine hahedinaraia.

<sup>13</sup> Bena haida ese Daniel na hanua pavapavana vairanai e hakaua vareai. Bena hanua pavapavana ese Daniel e hereva henia, eto, Oi na vanegai Daniel, noho-hedoa tauna, tamagu hanua pavapavana ese Iuda amo e mailaidia taudia ta.

<sup>14</sup> Harimu vada na kamonai, dirava helagadia ese e rohemumu, bona diari bona lalo-parara bona aonega herea-daena na oi lalomu ai vada e davaria.

<sup>15</sup> Benaini, aonega taudia bona babalau taudia na vairagu ai vada e hakaudia vareai, ina revareva bae duahia bona anina bae hadibalaigu totona, a ina kara anina ihahedinaraina na asi dibadia.

<sup>16</sup> A vada na kamonai, oi ese ġau anidia ihahedinaraidia bona lalo-hekwarahi ihamaoromaorodia na mai dibamu. Harihari ina revareva boma duahia diba bona anina boma hadibalaigu, bena

dabua kakakakadia amo bae hadabualaimu, bona *gold agevana* na aiomu ai bae ha-inulaimu, bona basileia lalonai lohia dagina ihatoina bavabia.

<sup>17</sup> Bena Daniel na hanua pavapavana vairanai e haere, eto, Emu herahia ġaudia na emu ai bae mia, bona emu dava ġaudia na tau ta ba henia; ġau tamona lau ese revareva baina duahia, hanua pavapavana emu ai, bona anina danu baina hadibalaimu.

<sup>18</sup> Pavapava e, Herea Mikamika Diravana ese tamamu Nebukadnesara na pavapava dagina, dagi badana, hairai bona lohia siahuna e henia;

<sup>19</sup> bona vada e henia dagina badana dainai bese idau-idau bona basileia idau-idau bona gado idau-idau iboudiai na ia vairanai e heude-heudeva bona e gariva. Iala-masedia e urava taudia na e aladia maseva, bona ihamauridia e urava taudia na e hamauridiava; iabi-isidia e urava taudia na e abidia isiva, bona iato-dihodia e urava taudia na e atodia dihova.

<sup>20</sup> A sibona e heabi isi bona lalona e ha-aukaia, bena hekokoroku karadia e karava; una negana ai pavapava teronona amo e hadihoa bona hairaina e abia oho,

<sup>21</sup> taunimanima bogaragidia amo e lulua lasi, lalona na boroma lalona hegereggerena ai ela, uda donikidia ida e nohova; rei e aniva, boro-makau na heto, bona tau-anina na guba hununa ese e haparipariava, ema bona ia vada e diba Herea Mikamika Diravana ese taunimanima edia basileia e lohiaiamu, bona e uramu baine henia tauna na e heniamu, baine lohiaia totona.

<sup>22</sup> Oi danu, ia natuna Belesasara, ena be ina idoinai dibamu to so hahemanaumu;

**23** a oi na sibomu vada o heabi isi, guba Lohiana vada o dadaraia; iena dubu keheredia na oi vairamu ai vada e vareailaidia, bona oi bona emu lohia taudia bona adavamu korikoridia bona vada o adavadia hahinedia ese unu ġau lalodia amo vine ranuna vada o inu; *silver, gold*, auri labora-labora, auri, au bona nadi diravadia, asie itamu, asie kamonaimu, asie dibamu gaudia, vada o imodaidia, a laġamu na imana ai bona emu dala iboudiai na ienai Diravana na so matauraia.

**24** Bena ia vairana amo hari ima ta vada e siaia, bona ina revareva vada e torea.

**25** E torea revarevana binai: MENE, MENE, TEKELE, PARASINI.

**26** Anina binai: MENE, Dirava ese emu basileia dinadia vada e hagaudia bena vada e hadokoa;

**27** TEKELE, metaumu vada e hahetoho, so heġereġere;

**28** PERE, emu basileia vada e haria, Mede bona Parasa taudia vada e henidia.

**29** Bena Belesasara e haheġani, bena Daniel na dabua kakakakadia amo e hadabualaia, bona *gold* agevana na aiona ai e ha-inulaia, bona e gwauraia hedinarai, ia na lohia dagina ihatoina baine abia basileia lalonai.

**30** Una hanuaboi, Belesasara, Kaldea pavapavana, na e alaia mase.

**31** Bena Darauese, tau Mede, ese basileia e abia; ena mauri lagarudia na tauratōi-ahui-rua sisivana.

## 6

*Leona kohuana*

<sup>1</sup> Ena ura dainai, Darauese ese heitatao taudia sinahu-ta ruahui e duanaidia, basileia na bae bi-agua, basileia kahadia iboudiai;

<sup>2</sup> bona idia daediai hekwara taudia tatoi e atodia, ta be Daniel. Hari heitatao taudia ese edia āgaukara sivaraidia na hekwara taudia bae hamaorolaidia, hanua pavapavana ena āgau ta basine boio helaoreana.

<sup>3</sup> Bena hari Daniel ese hekwara taudia bona heitatao taudia iboudiai e hereadia, badina be lauma herea-daena ese e rohea; bena hanua pavapavana ese e laloa hata, basileia idoinai ikwarana ai baine halaoa eto.

<sup>4</sup> Bena hari hekwara taudia bona heitatao taudia ese hahebade badina ta e tahua, basileia āgaukarana dainai Daniel bae habadelaia eto; a hahebade badina ta eiava kerere ta asie davaria; badina be ia na e kara maoromaoro, bena kara rea ta eiava kerere ta ienai asie davaria.

<sup>5</sup> Bena unu tatau eto, Ina Daniel ihabadelaina badina ta basita davaria, a reana ena Dirava ena taravatu dainai ta baita davaria.

<sup>6</sup> Bena hari hekwara taudia bona heitatao taudia na e raka bou ela, hanua pavapavana dekenai, e hereva henia, eto, King Darauese e, ba mauri hanaihanai!

<sup>7</sup> Basileia ena hekwara taudia, ena lohia, ena heitatao taudia, ena hahealo taudia bona ena hegunalai taudia iboudiai ese lalodia vada e hatamonadia, hanua pavapavana ese taravatu ta baine haginia bona baine ha-aukaia, baineto dina toi-ahui lalodiai taunimanima iboudiai ese oi pavapava taumu sibomu bae gurimu diba, a ta ese dirava ta eiava tau ta bema guria, vada bae abia, leona kohuana lalonai bae tahoai vareai.

<sup>8</sup> Pavapava e, harihari taravatu ba haginia, bona iha-aukana pepana ai ladamu ba toreia, bena basie ha-idaua diba, Mede bona Parasa taudia edia taravatu dalana heğereğerena ai basie hadokoa diba.

<sup>9</sup> Taunabunai, King Darauese ese ladana e toreia una taravatu pepana ai.

<sup>10</sup> Daniel e diba pepa na e hetore, bena ena ruma ela. Ena ruma atai daiutuna na mai gaba-mauruna haida, Ierusalem italaina ai. Bena dina ta ta ai ia ese nega hatoi tuina e hadaiva, e ġuriġuriva bona ena Dirava e hanamo heniava, vaevae e karava heğereğerena.

<sup>11</sup> Benaunu tatau na e raka bou ela, Daniel e davaria, ena Dirava vairanai e ġuriġuriva bona e noinoiva.

<sup>12</sup> Bena idia ese hanua pavapavana e raka henia kahi, taravatu e herevalai henia, eto, Pavapava e, oi ese taravatu pepana o toreia, ani, oto dina toi-ahui lalodiai taunimanima iboudiai ese oi pavapava taumu sibomu bae ġurimu diba; a ta ese dirava ta eiava tau ta bema guria, vada bae abia, leona kohuana lalonai bae tahoa vareai. Hanua pavapavana e haere, eto, Hereva vada e auka midimidi, Mede bona Parasa taudia edia taravatu dalana heğereğerena ai basie hadokoa diba.

<sup>13</sup> Bena idia na hanua pavapavana vairanai e haere, eto, Pavapava e vanegai Daniel, Iuda amo e mailaidia taudia ta, ese se kamonai henimumu, bona vada o toreia taravatu pepana se badiniamu, a dina ta ta amo nega hatoi e ġuriġurimu.

<sup>14</sup> Unu hereva e kamonai negana ai, hanua pavapavana lalona vada e hisihisi herea, bona lalona e hadaia Daniel ede baine hamauria toma;

ia na e hekwarahi ela bona dina e diho, Daniel Ihamaurina totona.

<sup>15</sup> Benaunu tatau na hanua pavapavana dekena e raka bou ela, e hereva henia, eto, Pavapava e, ba diba, Mede bona Parasa taudia edia taravatu na iniheto: hanua pavapavana ese e haginiamu taravatuna na ta ese basine ha-idaua diba.

<sup>16</sup> Bena hanua pavapavana e hahegani; bena haida ese Daniel e mailaia, leona edia kohua lalonai e tahoa vareai. Hanua pavapavana ese Daniel e hamaoroa, eto, Emu Dirava, o toma henia diho louloumu Diravana, ese baine hamaurimu.

<sup>17</sup> Bena nadi ta e mailaia, kohua iduarana e koulaia; bena hanua pavapavana ese ia toana bona ena lohia taudia toadia na una nadi ai e kara, Daniel enai vada e kara ġaudia na ta ese basine ha-idaau helaoareana.

<sup>18</sup> Bena hanua pavapavana na ena rumela, e anivaga rani, lalona ihakeruna ġaudia haida ia dekena asie laohai, bona se mahuta.

<sup>19</sup> Daba e kinia, bena hanua pavapavana e tore isi, leona edia kohua e lao henia haraġa.

<sup>20</sup> Daniel e atoa kohuana na e raka henia kahi, bena mai ganaganana ida e boi lolo, Daniel e boi henia, eto, Daniel e, Mauri Diravana ena hesiai tauna, emu Dirava, o toma henia diho louloumu Diravana, ese ihamaurimu mai dibana eiava?

<sup>21</sup> Bena Daniel ese hanua pavapavana e haere henia, eto, Pavapava e, ba mauri hanaihanai.

<sup>22</sup> Egu Dirava ese ena aneru ta e siaia mai, bena ia ese leona ududia e hakapudia, bena asie hadik-agu; badina be ia vairanai lau na asi egu kerere, bona oi vairamu ai danu, pavapava e, lau na asina kara kerere.

<sup>23</sup> Bena hanua pavapavana na e moale dikadika, bena e hahegani, Daniel na kohua lalona amo bae abia lasi. Taunabunai Daniel na kohua lalona amo e abia lasi; bena bero ta ienai asie davaria, badina be h ese ena Dirava vada e abidadama henia.

<sup>24</sup> Bena hanua pavapavana ma e hahegani, bena unu Daniel e habadelaia taudia na e mailaidia, leona edia kohua lalonai e tahodia vareai, idia bona natudia bona adavadia danu. Bena dounu moru-dobidia ai, leona ese e daredia, turiadia iboudiai e hakwaidudia patapata.

<sup>25</sup> Bena King Darauese ese revareva ta e torea, bese idau-idau bona basileia idau-idau bona gado idau-idau taudia iboudiai, tanobada idoinai latanai e nohomu taudia, ediai, eto: Maino na emui ai baine bada.

<sup>26</sup> Na haheganimu, lau ese na lohiaiamu basileiana idoinai lalonai taunimanima na bae heude-heude bona bae gari, Daniel ena Dirava vairanai.

Badina be ia na Mauri Diravana,  
e mauri hanaihanaimu;  
ena basileia na basie habuaia tari ela bona hanai-hanai,  
ena siahu na baine hesiriu ela bona dokona.

<sup>27</sup> Ia na e hahemaurimu bona e herauamu,  
toa bona hoa karadia ia ese e karamu,  
guba ai bona tanobada ai danu.

Ia ese Daniel vada e hamauria,  
leona edia siahu amo.

<sup>28</sup> Bena hari Daniel ena namo e badava, Darauese ena lohia negana ai, bona Kurese, tau Parasa, ena lohia negana ai.

## 7

*Daniel ena nihi ta*

<sup>1</sup> Belesasara, Babulono pavapavana, ena lohia lağanina gini-gunana ai, Daniel na e nihi, bona mata-hanai ġaudia haida na kwarana lalonai e hedinarai, ena mahuta patana ai e hekureva negana ai. Bena ia ese nihi sivaraina e torea, bona anina e hahedinaraia.

<sup>2</sup> Daniel eto, Hanuaboi ai na mata hanai bena na itaia, guba laina haniosi ese gadobada e hahure-hurea.

<sup>3</sup> Bena mauri ġaudia badadia hani na davara lalona amo e dae, ita-itadia na idau-idau.

<sup>4</sup> Gini-gunana na leona na heto, a mai hanina, ugava hanina na heheto. Bena na itaiava ai na hanina e butudia oho, bena tano ai e haginia tore, aena ruaosi ai e haginia, taunimanima na heto, bona taunimanima darana e henia.

<sup>5</sup> Bena mauri ġauna ta ma na itaia, iharuana, bea na heto. E haginia tore, gini-gunana ohena ai, bona uduna ai na rudu turiadia autoi, isena padadiai. Ta ese e hamaoroa, eto, A tore isi, vamu momo bavani.

<sup>6</sup> Una murinai na roha lao, ta ma na itaia, taiga na heto, a manu hanidia hani na doruna ai; bona una mauri ġauna na mai kwarana hani danu; bena lohia siahuna na e henia.

<sup>7</sup> Una murinai, hanuaboi mata-hanaidia ai, mauri ġauna ihahanina na itaia, mai garina bona mai kudou-hetahana; ia na goada dikadika danu. Isena na auri gaudia, bona bada herea; bena ia ese ġau e aniva, e dare patapatava, bona momoruna na aena amo e moia patapatava. Ia na idau, dia e gunalaia ġaudia heġereġeredia; ia doana na gwauta.

**8** Doana na haerodia, bena na itaia, doa ma ta idia bogaragidiai e tubu, maraḡi-muaḡina; bena ia vairanaiunu doa gunadiatoi e heraga oho. Na itaiananu, una doa na mai matana, tau matana na heto; bona mai uduna, hereva badadia e gwaurai.

**9** Na itaiaava ai na terono haida na hehelai,  
benā ġauka ta na e helai diho;  
ena dabua na kuroka-kuroka, *snow* na heto,  
bona kwarana huina na mamoe huina ġoevaldaena na heto;  
ena terono na lahi hururu-hururudia,  
ava-keikeina na e aramu lahina.

**10** Ia vairanai lahi e aru lasiva,  
sinavai na heto;  
daha dahanese ia isiaina e lao heniva,  
gerebu gerebu na ia vairanai e giniva,  
hahemaoro tauna na e hahemaorova,  
bona buka na e hekehova.

**11** Bena hereva badadia, hari doa ese e gwaurai gaudia, daidiae na roha lao. Bena na roho laova ai, hari mauri ġauna na e alaia mase, tau-anina na e habuaia tari, e hen, Iahi ese baine ġolea oho.

**12** Hari mauri ġaudia oredia na edia lohia siahuna na e abia oho, a edia mauri na negataina e hadaudaua ela bona nega ta.

**13** Bena hanuaboi mata-hanaidiae na itaia,  
ta na guba oridia ai ema,  
ia na taunimanima natuna na heto;  
ia na Gauka dekena ema,  
benā vairanai e hakaua lao.

**14** Bena lohia siahuna e henia,  
bona hairai bona basileia danu,  
bese idau-idau bona basileia idau-idau bona gado  
idau- idau iboudiae ese

ia isiaina bae lao hen i helaoreana;  
 iena lohia siahuna na mia-hanaihanai siahuna,  
 basine puki oho ġauna,  
 bona ena basileia danu  
 ta ese basine habuaia tari.

<sup>15</sup> A lau Daniel na laumagu e daure, bona kwaragu mata-hanaidia ese e hagarigu.

<sup>16</sup> Bena unuseni ai e giniva taudia ta na raka henia kahi, na nanadaia, ina idoinai anina korikori be dahaka. Taunabunai ia ese e hamaorogu, bona unu ġau anidia e hadibalaigu, eto,

<sup>17</sup> Ini mauri ġaudia badadia haniosi na pavapava hahani, tanobada ai bae tore isi.

<sup>18</sup> A Herea Mikamika Diravana ena helaġa taudia ese basileia bae abia, basileia na bae ġaunaia hanaihanai, oibe, ela bona hanaihanai.

<sup>19</sup> Bena na ura baina diba, hari mauri ġauna ihahanina herevana korikorina be dahaka. Ia na idau, dia oredia iboudiai heġereġeredia. Ia na mai gari-badana; isena na auri bona kahauna na auri labora-labora. Ia ese ġau e aniva, e dare patapatava, bona momoruna na aena amo e moi patapatava.

<sup>20</sup> Bona doa gwauta kwarana ai herevadia danu, bona una doa ta, e tubu bena ia vairanai doa toi e moru ġauna, mai matana bona mai uduna bena hereva badadi e gwaurai bona ita-itana ese bamonita ita-itadia na e hereadiava gauna, herevana.

<sup>21</sup> Lau na roha laova ai, una doa ese helaġa taudia e tuari henidia bona e hadareredia,

<sup>22</sup> ela bona Ġauka na ema, bena ia ese hahemaoro e karaia, Herea Mikamika Diravana ena helaġa taudia maorodia e gwaurai; bena negana e gini dae helaġa taudia ese basileia e abia.

- 23** Taunabunai ia eto, Mauri ġauna ihahanina na iniheto:  
 Basileia ihahanina na tanobada latanai baine  
 vara;  
 ia na baine idau, dia basileia iboudiai  
 heğereğeredia;  
 ia ese tanobada idoinai baine hadonoa,  
 baine moia tao, baine hamakohia patapata.
- 24** Unu doa gwauta be pavapava gwauta,  
 una basileia lalona amo bae tore isi;  
 bona idia muridiai ma ta baine tore isi.  
 Ia baine idau, dia unu gunadia heğereğeredia,  
 ia ese pavapava tatoi baine hadareredia.
- 25** Ia ese Herea Mikamika Diravana baine gonago-  
 nalaia,  
 bona Herea Mikamika Diravana ena helāga  
 taudia edia goada baine ha-ore;  
 ia ese nega bona taravatu iha-idaudia daladia  
 baine lalo hata,  
 bena ia imana ai bae hen,  
 lağani ta bona lağani rua bona lağani kahana  
 ai.
- 26** A hahemaoro tauna ese hahemaoro baine  
 karaia,  
 bena iena lohia siahuna bae abia oho,  
 bae ha-orea bona bae habuia tari ela bona  
 dokona.
- 27** Bena basileia bona lohia siahuna,  
 bona guba idoinai henunai e miamu basileia-  
 dia siahudia danu na  
 Herea Mikamika Diravana ena helāga taudia  
 bae henidia;  
 edia basileia na mia-hanaihanai basileiana ai  
 bainela,  
 bona oreia mai siahudia iboudiai ese

isiaidia bae lao hen i bona bae kamonai henidia.

**28** Hereva dokona binai. A lau Daniel egu lalo-hadai ese e hagarigu bona na labora ġuguru; a ina hereva na lalogu ai na dogoa tao.

## 8

### *Daniel ena nihi iharuana*

**1** King Belesasara ena lohia laġanina ihatoina lalonai, lau Daniel na mata hanai lou, nega gunana ai egu ai e kau ġauna e hedinarai murinai.

**2** Egu mata-hanai ai ġau haida na itadia; na itadia negana ai lau na hanua badana Susa ai, Elam tanona ai; bena mata-hanaigu ai na itaia, lau na Ulai sinavaina isena ai.

**3** Lau na roha isi, bena mamoe maruanena ta sinavai isena ai ginina ai na itaia. Ia doana na rua; ruaosi lalata, a ta ese ma ta e hereaia, bona latahereana na gabe ai e tubu ġauna.

**4** Bena na itaia, hari mamoe maruanena na mai daġedaġena ida e heau taiko-taiko, laħara kahana ai bona mirigini kahana ai bona diho kahana ai; mauri ġauna ta se heġereġere ia vairanai baine gini, bona ta se heġereġere iena siahu amo baine heraua. Ia ese sibona ena ura e karava, bona sibona e heimodaiva.

**5** Na haeroava ai, nani maruanena ta na itaia, laħara kahana amo ema, tanobada idoinai e hanaia, tano ai se moi kauva; ia na mai doana ta, hedinarai mataka-mataka ġauna, matana rúaosi pada-diai.

**6** Ia na ema, hari mamoe maruanena mai doana rua, sinavai isena ai na itaia ġauna, dekenai; bena mai badu ġaragħarana ida e heau henia.

<sup>7</sup> Lau na itaia, ia ese hari mamoe maruanena e heau henia kahi, bena e badu henia lalo-dika, e nuaia, doana ruaosi e hakwaidudia. Hari mamoe maruanena na asi goadana ia vairanai baine gini; una ġau ese e nuaia keto tano ai, bena e moia patapata; asi tauna ta ese una mamoe maruanena na ia siahuna amo baine hamauria diba.

<sup>8</sup> Bena hari nani maruanena na sibona e heāgi dikadika; a ena goada negana ai hari doana badana e kwaidu, bena ia gabuna ai doa hani, hed-inarai mataka-mataka ġaudia, e vara, guba laidia haniosi kahadia e tubu henidia.

<sup>9</sup> Idia ta ena amo doa maragina ta e vara, bena e tubu badabada, diho kahana bona mairiveina kahana bona mai hairaina tanona e tubu henidia.

<sup>10</sup> E tubu badabada ela bona guba oreana; bena hisiu haida na tano ai e tahodia dobi, bena e moidia patapata.

<sup>11</sup> Sibona e heagi, guba oreana lohiana e dae henia; bena ġole-oho boubouna, e henilouloumu ġauna, na iena amo e abia oho, bona ena gabu helāgana na e ġigia dobi.

<sup>12</sup> Bena oreana na ia imana ai e heato, bona gole oho boubouna, e henilouloumu ġauna, danu, kara havara dainai; hereva momokani na tano ai e henege dobi, bona hari doa e gaukarava bona ena namo e habadaiaava.

<sup>13</sup> Bena helāga tauna ta gadona na kamonai; bena helāga tauna ma ta ese e hereva guna tauna na e nanadaia, eto, Ini mata-hanai ġaudia, ġole-oho boubouna, e henilouloumu ġauna, bona kara havara, gabu e havahuamu gauna, bona gabu helāgana bona oreana na ae-moimoilai ġaudia ai e halaodiamu na bae hesiriua ela bona edena nega

ai?

<sup>14</sup> Bena ia ese e haere henia, eto, Ela bona adorahi daha-rua sinahu-toi bona daba daha-rua sinahu-toi; bena gabu helāgana na bae hanamoa lou, oromana korikorina baine abia lou.

<sup>15</sup> Lau Daniel ese una mata-hanai na itaiq vaitani, bena anina na tahua; bena ta na lau vairagu ai e gini, ita-itana na taunimanima na heto.

<sup>16</sup> Bena tau ta gadona na kamonai, Ulai sinavaina isena padadia amo e boiboi, eto, Gabriel e, ina tau na mata-hanai anina ba hadibalaia.

<sup>17</sup> Taunabunai, ia ese egu gini gabuna e raka henia kahi; bena ia ema negana ai na gari, bena na goru diho. A ia ese e hamaorogu, eto, Taunimanima natuna e, ba diba, una mata-hanai na nega dokona e hahedinalaiamu.

<sup>18</sup> Ia dounu e herevava ai, lau na goru-dihogu ai na mahuta hedavauhe; a ia ese e daugu toho, bena e haginigu tore.

<sup>19</sup> Ia eto, A itaia, baina hadibamu, badu negana dokona ai dahaka baine vara; badina be nega dokona vada e duanaia negana herevana binai.

<sup>20</sup> Hari mamoe maruanena o itaia mai doana rua, unu na Media bona Parasa pavapavadia.

<sup>21</sup> Hari nani maruanena na Helene tanona pavapavana; doa badana ia matana ruaosi padadiai na pavapava gini-gunana.

<sup>22</sup> Doa ta e kwaidu, bena ia gabuna ai doa hani e tubu anina be basileia hani na iena bese amo bae vara, a iena siahu basie haheğereğerea.

<sup>23</sup> Edia lohia negana dokona ai, kara havara taudia bae goada ġuġuru negana ai, pavapava ta, vaira-auka bona hereva hehunidia anidia mai dibana tauna, baine tore isi.

**24** Ena siahu baine bada; ia ese hahebua-tari badana baine havaraia, ena ġaukara ai baine kwal-imu, goada tauna bona orea helāgana taudia na baine habuadia tari.

**25** Ena dibaka ai, kara koikoi anidia baine habadadia, ia unana henunai, bona lalona ai si-bona baine heāgi. Ia ese hutuma baine habuadia tari taku; lohia edia Lohia danu baine tuari henia, bena baine darere, a dia taunimanima ta imana amo.

**26** Hari adorahi bona daba sivaraidia mata-hanaina na momokani; a una mata-hanai ba huncia, badina be una na dina hoho vairai herevana.

**27** Bena lau Daniel taugu na e manori, dina haida na hekure noho, mai goreregu ida. Bena na tore isi, hanua pavapavana ena ġaukara na karaia; a una mata-hanai dainai lalogu e hekwarahi; bona asina dibaia namonamo.

## 9

### *Daniel ena ġuriġuri*

**1** Darauese Ahasuero, tau Mede, ese Kaldea basileiana e pavapavaia laġanina gini-gunana ai,

**2** ena lohia laġanina gini-gunana lalonai lau Daniel buka lalodia amo na diba laġani hida baela ela bona Ierusalem ihavahuna baine guguru, Iehova ena hereva peroveta tauna Ieremia enai e kau heġereġerena; unu laġanidia be hitu-ahui.

**3** Bena Ĝaubada Dirava na haġerea, ġuriġuri ai bona noinoi ai na tahua, mai anivagagu bona mai puse-dabuagu bona mai kahugu ida.

**4** Iehova, egu Dirava, na guria, egu dika na gwaurai hedinarai, nato:

Ĝaubada e, Dirava badana bona mai garina, oi ese emu gwauhamata bona emu hebogahisi o hahesiriudiamu, e ura henimumu bona emu ha-heğani e badinadiamu taudia ediai.

<sup>5</sup> Ai na vada a kara dika, vada a kara kerere, kara havara bona dağedağe karadia vada a kara, emu haheğani bona emu taravatu daladia amo vada a raka siri;

<sup>6</sup> emu hesiai taudia, peroveta taudia, oi ladamu ai emai pavapava, emai lohia, senemai bona tano taudia iboudiai e hereva henidia taudia na asia kamonai henidia.

<sup>7</sup> Ĝaubada e, kara maoromaoro na oiemu ai, a ai emai ai na hemarai, ina dina ai heğereğerena, Iuda taudia ediai, bona Ierusalem inoholaina taudia ediai, bona Israel idoinai enai, gabu kahikahi taudia bona gabu daudau taudia, vada o luludia lao tanodia iboudiai lalodiai; badina be idia ese oi ihadikamu karadia vada e kara.

<sup>8</sup> Ĝaubada e, hemarai na ai emai ai, bona emai pavapava bona emai lohia bona senemai ediai, badina be ai ese vada a kara dika henimu.

<sup>9</sup> Ĝaubada, emai Dirava, na mal hebogahisina bona mai dika igwau-taona; badina be ai ese vada a dağedağe henia

<sup>10</sup> bona Iehova, emai Dirava, gadona asia kamonai henia, ena taravatu, ena hesiai peroveta taudla eaia amo vairamai ai e atodia taravatudia, asia badinadia.

<sup>11</sup> Israel idoinai ese emu taravatu vada e tataia utu; vada a raka siri, oi eremu ikamonaina asia ura. Heuduguirai bona gwauhamata helağana Dirava ena hesiai tauna Mose ena taravatu ai e hetore gaudia, na ai latamai ai vada eme hepubu dobi, badina be ai ese vada a kara dika henia.

**12** Ia ese ena hereva vada e hamomokanidia. ai latamai ai bona ikwaramai taudia latadiai e gwaurai gaudia, hahehis karana badana na ai latamai ai vada e mailaia; badina be guba idoinai henunai kara ta nega ta ai se karaia, Ierusalem vada e kara henia heğereğeren.

**13** Mose ena taravatu ai e torea heğereğerenai, ina hahehis karana idoinai na ai latamai ai vada e kau, ġau tamona Iehova, emai Dirava, asia noi henimu ba lalo namo henimai, emai kara havara amo ba mede kerehai bona emu hereva momokanidia nahuadia baia toho helaoreana.

**14** Taunabunai Iehoya ese hahehis karana vada e haheğaeğaea bona latamai ai vada e mailaia; badina be Iehova, emai Dirava, na maoromaoro, vada e kara karadia iboudiai lalodliai, bona ai ese ia erena asia kamonaia.

**15** Ġaubada e, emai Dirava e, oi ese emu bese taudia na Aigupto tanona amo o hakaudia Lasi, mai imamu goadana ida, bona ladamu vada o habadaia, ina dina ai heğereğerenai; a harihari ai ese vada a kara dika, vada a kara havara.

**16** Ġaubada e, emu kara maoromaorodia iboudiai heğereğeredia ai, emu badu bona emu lalo-dika na emu hanua Ierusalem, emu ororo helağana, amo baine siri; badina be emai kara dika bona senemai edia kara havara daidiae, Ierusalem bona oiemu bese na gwaurai-gwaurai herevana ai vada e ha-helao, e ġeġemai dae taudia iboudiai bogaragidiai.

**17** Taunabunai, emai Dirava e, emu hesiai tauna ena ġuriġuri bona ena noinoi ba hakala henidiae, bona oi sibomu daimu ai, Ġaubada e, oi vairamu ese emu gabu helağana, vada eme vahu gabuna, baine hadiaria.

<sup>18</sup> Egu Dirava e, laiamu a hakala, a kamonai, matamu a hapapa, ġaġaemai ai ba itamai, bona oi ladamu e nemailaia hanuana ba itaia. Badina be emai noinoi na oi vairamu ai e daemu, dia ai emai kara maoromaoro dайдai, a oiemu hebogahisi badana dainai.

<sup>19</sup> Ĝaubada e, a kamonai; Ĝaubada e, emai dika ba gwau tao; Ĝaubada e, ba lalomai, ba kara; egu Dirava e, basio halahe, oi sibomu daimu ai, badina be emu hanua bona emu bese na oi ladamu e hahenemailaia.

### *Peroveta herevadia*

<sup>20</sup> Egu hereva bona egu ġuriġuri lalodai egu kara dika bona egu bese Israel edia kara dika na gwaurai hedinaraiva, bona Iehova, egu Dirava, na noinoi heniava, egu Dirava ena ororo helāgana dainai;

<sup>21</sup> bena, ġuriġuri dounu na gwauraiava ai, hari tau Gabriel, mata-hanai ai na itaia guna tauna, na dekegu e roho mai haraga, adorahi boubouna negana ai.

<sup>22</sup> Ia na ema, e hereva henigu, eto, Daniel e, aonega bona lalo-parara batna henimu totona vada na hedinaraimu.

<sup>23</sup> Emu noinoi matamana ai hereva ta e lasi, bena iħamaorolaimu totona vada nama, badina be oi na e lalokau henimu badamu; taunabunai, hereva ba haeroa, bona mata-hanai anina ba diba.

<sup>24</sup> Laġani hitu nega hahitu-ahui be vada e gwauraidia, emu bese bona emu hanua helāgana lata-dai, kerere iha-orena, kara dika ihadokona, kara

havara irohodia, baine mia hanaihanai karamaoromaorona imailaina, matahanai bona peroveta tauna ihamomokanina bona helaga-herea gabuna ihorona totodia.

<sup>25</sup> Taunabunai ba diba, lalomu danu baine parara, Ierusalem ihanamo-louna bona ihaginina herevana baine hedinarai negana ela bona lohia ta, e horoa tauna, bainema na pura hitu. Bena pura tauratoi-ahui rua lalodai bae haginia lou, mai ariarana bona mai iğeğe-ahuna koupana, a hekwakwanai momo negana ai.

<sup>26</sup> Benaunu pura tauratoi-ahui rua muridiae, e horoa tauna na bae negea daure, ġau ta ienai basine mia; bona bainen-a lohiana ena oreataudiae ese hanua bona gabu helägana bae habuadie tari. Utu-utu ese baine ha-oreea, bona tuari do baine hesiriela bona dokona. Hahevahu karadia vada e gwaurai hata.

<sup>27</sup> Bena ia ese hutuma ida bae hegwau hamata heheni, gwauhamata aukana ta, ela bona pura ta baine ore. Pura kahana ai ia ese boubou bona herahia karadia baine hadokodia, bona ġau dikarohorohona hanina latadi bae hahevahu tauna ta bainema, ela bona vada e gwauraia hata dokona negana na hahevahu tauna latanai baine hebubu dobi.

## 10

*Daniel ena mata-hanai Tigris sinavaina isena ai*

<sup>1</sup> Kurese, Parasa pavapavana, ena lohia lağanina ihatoina ai, hereva ta e hedinarai Daniel (ladana ta na Beletesasara) enai. Hereva na momokani, tuari badana herevana. Hereva anina vada e dibaia, bona matahanai anina danu.

<sup>2</sup> Unu dinadia ai, lau, Daniel, Ialogu e hisihisiva pura toi lalodiai.

<sup>3</sup> Aniani gaihodia asina ani, vamu eiava vine ranuna na udugu ai asie vareai, bona dehoro ai asina hedahu, ela bona unu pura ġugurudia toi.

<sup>4</sup> Hua gini-gunana dinana iharuahui-hanina ai, sinavai badana, ladana Tigris, isena ai na giniva negana ai,

<sup>5</sup> lau na roha isi, tau ta na itaia, ena hahedoki na dabua aukana ġaua bona ena gaba ġauna na Ufasa *gold-na*.

<sup>6</sup> Tau-anina na berulio nadina na heto; vairana ita-itana na kevaru; matana na kede hururu-hururudia na heheto, imana bona aena na auri labora-labora hmorena na heto, bona erena na hutuma eredia na heto. \*

<sup>7</sup> Lau, Daniel, sibogu ese mata-hanai na itaia, badina be bamogu ese asie itaia, to gari ese e butudia tao, bena e heau, bae komu totona.

<sup>8</sup> Taunabunai, hu na sibogu na noho, una mata-hanai badana na itaia, bena goadagu vada e ore; vairagu hairaina e idau herea, bona goadagu taina dia mia.

<sup>9</sup> Bena erena na kamonai. Erena na kamonai negana ai, lau na goru parapara tano ai, na mahuta hedavauhe.

<sup>10</sup> Bena ima ta ese e daugu toho, bena na hetao isi, tuigu ai bona imagu ai, mai heude-heudegu ida.

<sup>11</sup> Ia ese e hereva henigu, eto, Daniel e, e lalokau henimu badamu taumu, na hamaorolaimumu herevadia nahuadia ba toho, ba gini tore, badina

\* **10:6** Berulio na herahera nadina ta ladana.

be ina harihari oi dekemu vada e siaigu mai. Ina hereva e hamaorolaigu lalonai, na gini tore mai heude-heudegu ida.

<sup>12</sup> Bena ia ese ma e hamaorogu, eto, Daniel e, basio gari, badina be lalo-parara o tahua matama bona emu Dirava vairanai sibomu o hahemanau dinana amo, emu hereva na vada e kamonai, bena emu hereva daidai vada nama.

<sup>13</sup> Parasa basileia lohiana ese dina ruahui-ta e ginigu shu; bena Mikael, lohia badana ta, na ikahagu totona ema, taunabunai unuseni ai na rakanania, Parasa basileia lohiana ida.

<sup>14</sup> Bena nama, dina gabedia ai dahaka dahaka baine vara emu bese taudia ediai baina hadibamu totona. Badina be mata-hanai na nega vaira ġauna.

<sup>15</sup> Ini hereva e hamaorolaigu negana ai, tano na igo henia, asi reğereğegu na noho.

<sup>16</sup> Bena ta, ita-itana na taunimanima natudia ta na heto, ese bibinagu e daudia toho. Bena udugu na kehoa, na hereva. Vairagu ai e giniva tauna na hamaoroa, nato, Egu lohia e, na mata hanai dainai, hisihisi na egu ai vada e kau, bona egu goada vada e ore.

<sup>17</sup> Egu lohia emu hesiae tauna na egu lohia ida ede baita hereva-hereva toma? Badina be harihari goadagu taina na dia mia, bona lağagu taina danu dia mia.

<sup>18</sup> Una murinai ta, ita-itana na taunimanima na heto, ese e daugu toho, e hagoadagu.

<sup>19</sup> Ia eto, E lalokau henimu badamu taumu e, basio gari, maino na emu ai baine mia; ba goada, ba haheauka. E hereva henigu negana ai na goada, bena nato, Egu lohia e, a hereva, badina be vada ome hagoadagu.

**20** Bena ia eto, Oi dibamu dahaka dainai dekemu vada nama a? A harihari baina lou lao, Parasa lohiana baina tuari henia; baina hadarerea, bena Helene lohiana bainema.

**21** A baina hamaoromu, hereva momokanina bukanai ai ede e hetore tomamu; asi tauna ta ohegu kahana ai e tuarimu, emu lohia Mikael mo sibona.

## 11

**1** A lau be Darauese, tau Mede, ena lohia lağanina gini-gunana ai na tore isi, baina hamomokania bona baina hagoadaia totona.

### *Mirigini kahana pavapavana bona diho kahana pavapavana*

**2** Harihari lau ese hereva momokanina baina hahedinarai henimu. A itaia, pavapava tatoi ma bae tore isi Parasa ai, bona ihahanina ena tağā ese idia tatoiosi edia tağā baine hereadia; bena ena tağā dainai baine goada negana ai, ia ese taunimanima iboudiai lalodia baine ani, Helene basikiana bae hadikaia.

**3** Bena pavapava mai siahuna ta baine tore isi; ia baine lohia mai siahuna ida, bona ena ura heğereğerena ai baine karaia.

**4** Baine tore isi murinai, ena basileia baine heğigi rohoroho bona baine hehari, guba laidia haniosi ediai; ia garana basie abia, bona ta ese basine lohiaia mai siahuna ida, iena lohia siahuna heğereğerena; badina be ena basileia baine herağā oho, idaudia haida ese bae abia, dia idia:

**5** Bena diho kahana pavapavana baine goada, a iena lohia tauna ta ese goada ai baine hereaia, bena ena lohia siahuna na baine herea.

**6** Laḡani haida baela, bena bae herohemaino; bena diho kahana pavapavana natuna hahinena na mirigini kahana pavapavana dekena bainela, maino ihavarana totona; a una hahine imana siahuna na basine mia, bona una tau mai natuna ida basie noho daudau; bena una hahine na baine heabi mauri, ia bona ena hesiai hahinedia bona natuna bona adavana.

**7** Unu negadia ai, una hahine ramuna amo e tubu rigidia ta na una tau gabuna ai baine tore isi, bena ia ese tuari oreana baine tuari henia, mirigini kahana pavapavana ena rum aukana ai baine dae kau, baine ala-ala henidia, bena baine kwalimu.

**8** Edia dirava bona edia kaivakuku, e ha-hetaridia ġaudia, bona edia sdver bona *gold* ġaudia, ġau namo-hereadia, danu baine abidia, Aigupto baine laohaidia; bena laḡani haida lalodiai ia ese mirigini kahana pavapavana basine tuari henia.

**9** Bena hari mirigini kahana pavapavana na diho kahana pavapavana ena tano lalonai baine raka vareai, a ma baine lou, ena tano korikori bainela.

**10** Bena ia natuna mamaruanedia bae tuari, tuari oreadia badadia momo bae haboudia, bena bae aru lao, bae utua dae, bae hanai, tuari ma bae laohaia ela bona ena rum aukana.

**11** Bena diho kahana pavapavana na mai baduna ida baine raka lasi, mirigini kahana pavapavana baine tuari henia; oreia bada-hereana baine haboua, a una oreia na ia imana ai baine heato.

**12** Bena hari oreia bada-hereana baine darere negana ai, ia lalona baine heagi, bena gerebu gerebu baine hadareredia, to basine kwalimu.

**13** Badina be hari mirigini kahana pavapavana ese hutuma ma baine haboudia, ina hutuma ese e haboua guna oreana na baine hereaia; bena lağani haida baela murinai ia na ma baine tore isi, mai ena tuari oreana badana bona ena kohu momo herea ida.

**14** Unu negadia ai hutuma ese diho kahana pavapavana bae tuari henia, bona emu bese korikorina bogaragina amo dağedağe taudia haida bae tore isi, mata-hanai anina ihavarana totona; to basie kwalimu.

**15** Bena mirigini kahana pavapavana na bainema, tano baine larebaia heğege, bena hanua auka-hereana ta na baine abia. Bena diho kahana tuari oreadia na basie gini tutuka, oibe, ena tuari diba-herea taudia na basie gini tutuka, badina be edia goada basine heğereğere.

**16** A baine tuari henia tauna ese sibona ena ura heğereğeren a baine karaia; tau ta ia vairanai basine gini diba. Ia na tano herea-daena ai baine gini; idoinai na ia siahuna lalonai baine mia.

**17** Ia vairana baine ha-aukaia, ena basileia goadana idoinai ida bainema, herohemaino herevadıa baine mailai, bona karadia baine kara. Hahine herea-daena baine henia, basileia ihabua-tarina helaoreana; a anina basine vara bona basine druya.

**18** Gabeamo ia talaina na kone tanodia baine henidia, bena momo herea baine abidia. A tuari lohiana ta ese ena hekokoroku baine laoa ahu; momokani, ma baine haloua ia latanai.

**19** Bena talaina na ena tano korikori gabudia aukadia ma baine henı; a baine hetutuhi, baine hekida diho, bena ta ese basine davaria.

**20** Bena tau ta baine tore isi, ia gabuna ai baine

gini; una tau ese heaiva monina igwauraina tauna ta baine siaia lao, ena basileia kahadia hereadaedia iboudiai lalodai; a dina hida hona baela, bena haida ese bae alaia, dia badu ai bona dia tuari ai.

<sup>21</sup> Ia gabuna ai bonegita tauna ta e tore isi, pavapava dagina asie henia tauna; ia na baine gini lasi kava, boga-alaga herevadia amo basileia na baine abia.

<sup>22</sup> Tuari oreadia na ia vairanai bae hedaro oho, bae karoho rohoroho, bona herohemaino lohiana danu.

<sup>23</sup> Ia ida bae herohemaino negana amo, ia na baine kara koikoi; bena orea maragina ida baine goada.

<sup>24</sup> Tano ena taḡa-herea gabudia ai baine hedinarai kava, bena tamana bona tubuna asie kara karadia baine kara, dadidadi bona henao kohudia bona ġau idau-idau na bogaragidiai baine ġigidia rohoroho. Gabu aukadia ihabua-taridia daladia baine lalo hata, a basine maivalo.

<sup>25</sup> Bena tuari oreana badana amo ena siahu bona ena haheuka baine habadadia, diho kahana pavapavana ihadikana totona; bona diho kahana pavapavana danu tuari oreana badahereana bona goada-hereana amo baine tuari; a basine gini tutuka, badina be haida ese ia ihadikana totona bae henega bou.

<sup>26</sup> Ena aniani gaiho-lia bae ani taudia ese danu bae hahekawhanaia; ena tuari oreana baine hedaro oho, bona hutuma na ala-ala ai bae hekida diho.

<sup>27</sup> A hari pavapava raruosi be kara dik a bae uralai bada; pata tamona ai koikoi herevadia bae gwaurai, a anidia basie vara; badina be dokona be

dohore, vada e gwauraia guna negana ai mo.

<sup>28</sup> Bena ena tano korikori baine lou henia, mai tağana ida; a lalona ese herohemaino helāgana baine dadaraia. Ena ura baine karaia, bena ena tano korikori baine lou henia.

<sup>29</sup> E gwauraia guna negana ai ia ma baine lou lao, diho kahana; a ina negana ai nega gunana heğereğerena ai basine vara lou.

<sup>30</sup> Badina be Kitim lagatoidia na ia ihadikana totona bae mai henia; bena ia na baine gari, baine raka oho, mai baduna ida baine lou lao, herohemaino helāgana ihadikana karadia baine kara. Baine lou lao, herohemaino helāgana e rakataniamu taudia baine kamonai henidia.

<sup>31</sup> lena tuari oreadia haida bae hedinarai, dubu bona ruma aukana bae hamirodia, bona ġole-oho boubouna, e henı louloumu ġauna, bae abia oho, bona ġau dika-rohorohona, hahevahu ġauna, bae haginia.

<sup>32</sup> Herohemaino e hadikaiamu taudia na bogalaga herevadia amo baine dibaganidia; a edia Dirava dibadia taudia na bae gini tutuka-tutuka, bona edia kara bae kara.

<sup>33</sup> Aonega taudia hahidaosi taunimanima bogaragidiai e nohomu ese hutuma na bae hadibadibadia; ġau tamona idia na dare bona lahi hururuhururuna bona abi-mauri bona dadidadi amo bae dika, dina haida lalodai.

<sup>34</sup> Bae dika negana ai, idia ese hekaha taina bae davaria. Hutuma na ediai bae tao, mai edia bogalaga herevadia ida;

<sup>35</sup> aonega taudia haida bae hekida diho, ihanamodia bona ihağoevadia bona ihakurokurodia totona, ela bona nega dokona,

badina be vada e gwauraia guna negana na do se kau.

<sup>36</sup> Hanua pavapavana ese ena ura hegereggerena baine karaia; sibona baine heimodai, sibona baine heagi, dirava iboudiai daediai, bona hoa herevadia baine gwaurai, dirava edia Dirava latanai. Namona baine hesiriu, ela bona badu baine guguru; badina be vada e gwawaia hata karana do baine hekara.

<sup>37</sup> Senena edia dirava eiava hahine e lalokau heniamu diravana na basine kamonai henidia; bona dirava idauna ta basine kamonai henia, badina be sibona baine heimodai, dirava iboudiai daediai.

<sup>38</sup> Idia gabudia ai ia ese gabu aukadia diravana baine imodaia; senena asi dibadia diravana na goW bona *silver*, dava-bada nadidia bona davabada herahia gaudia, amo baine imodaia.

<sup>39</sup> Gabu auka-hereadia baine hadareredia, dirava idauna ta ena hekaha dainai; bae abiabiraia taudia na ia ese baine imodaidia bada. Ia ese hut uma ilohiadia ai baine halaodia, bona dava bagunai tano baine haria.

<sup>40</sup> Nega dokona ai, diho kahana pavapavana ese baine tuari henia; a mirigini kahana pavapavana ese baine heau henia, koe-hirihiri na heto, mai ena kariota bona ena hosi-gui taudia bona ena lagatoi momo ida; tano haida baine lao henidia, baine ha-utudia dae, ma baine hanai.

<sup>41</sup> Tano herea-daena lalonai baine kau. Gerebu gerebu bae hekida diho, a ini na id imana amo bae roho mauri: Edom bona Moab bona Amono besena kahana badana.

<sup>42</sup> Tano idau-idau ihadikadlia totona ia ese imana baine toia roro; Aigupto tanona danu basine roho mauri.

<sup>43</sup> Aigupto ena dava-bada ġaudia, *gold* bona *silver* ġaudia bona ġau namo-hereadia iboudiai, bi-agudia ai bainela; bena Libia bona Etiopia taudia ese ia bae ġavaia.

<sup>44</sup> A sivarai haida mairiveina kahana bona mrigini kahana amo baema, bae hagaria; bena ia na mai badu-ğarağarana ida baine raka lasi, hutuma baine aladia ore bona baine habuadia tari helaoreana.

<sup>45</sup> Ena kalaga herea-daedia na davara bona ororo helağana mai hairaina padadiai baine haginiidia; ġau tamona ena doko negana baine kau, una negana ai ta ese basine kahaia.

## 12

### *Nega dokona*

<sup>1</sup> Una negana ai Mikael, emu bese ireğuna lohi-anan badana, baine tore isi. Hekwakwanai negana ta baine vara; unuhetomana na nega glmadia ta ai se vara, basileia e hematama negana amo ema bona hari ela bona una nega baine kau. A una negana ai emu bese taudia na bae rauadia, buka ai ladadia vada e hetore taudia iboudiai.

<sup>2</sup> Tano gahuna ai e mahutamu taudia hutuma na bae noga, haida mauri hanaihanai enai, ma haida hemarai bona hedadarai hanaihanai enai.

<sup>3</sup> Bena aonega taudia na bae diari, guba kiama-kiamana na heto, bona hutuma kara maoromaoro dalana lalonai bae hakaudia vareai taudia na bae diari, hisiu na heheto, ela bona hanaihanai.

<sup>4</sup> A oi, Daniel, hereva ba hunidia, bona buka ba koua kunuka-kunuka, ela bona dokona negana. Hutuma na bae heau lao heau mai, bona laloparara bae habadaia.

<sup>5</sup> Bena lau, Daniel, na roha lao, tatau raruaginidia ai na itadia, ta sinavai inikahana ai bona ta sinavai unukahana ai.

<sup>6</sup> Bena dabua aukana e hahedokilaia bona sinavai ranudia daediai nohona tauna na nanadaia, nato, Nega ede daudauna bainela ela bona ini hoa karadia dokodia.

<sup>7</sup> Bena dabua aukana e hahedokilaia bona sinavai ranudia daediai nohona tauna ese imana idibana bona laurina amo guba e dudu henia; bena na kamonai, ia na e noho hanaihanaimu Diravana ladana ai e gwau hamata, lağani ta bona lağani rua bona lağani kahana baela, bena bese helağana ena siahu igigi-rohorohona baine ore negana ai, ini ġau iboudiai anidia bae vara.

<sup>8</sup> Hereva vada na kamonai, to lalogu se parara. Bena lau nato, Egu lohia e, ini ġau amo dahaka baine vara?

<sup>9</sup> Ia eto, Daniel e, emu dala ai a raka lao; badina be hereva vada hehehuni, vada e hekou kunukakunuka, ela bona dokona negana.

<sup>10</sup> Hutuma na bae haheğoeva, bae hahekurokuro, bae ġoeva dae; a kara dika taudia do bae kara dika. Kara dika taudia ta lalona basine parara, a aonega taudia lalodia bae parara.

<sup>11</sup> Bena ġole-oho boubouna, e henilouloumu gauna, baine heabi oho, bona ġau dikarohorohona, e hahevahumu ġauna, bae haginia, negana amo dina daha-ta sinahu-rua taurahanita-ahui do baela.

<sup>12</sup> Baine henari noho ela bona dina daha-ta sinahu-toi toi-ahui ima bae ore tauna na namo.

<sup>13</sup> A emu dala ai ba raka ela bona dokona, bena oi na do ba lağanani, bona doko dinadia ai na vada e gwaurai henimu gabuna ai do ba gini.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca